

2 CORINTIOS

Pablo Caatiniuhi Corintori Iicaja Moocaani Iijaminaadi.

1 Uujoho Pablo Jesucristo minisuminaafi Moocaani jeebii onoobadi. Jaabo uujoho onoonoco nahabo Timoteo caatinihi jihaameque monahabomi Moocaani iijaminaa Corintori iicamedi, jaabadiro bu paryi Acaya jiinjieri iicamo, paryi Moocaanita iicamedi icano. ² Jaamo amiihai magaayiciqui imi icaco, sajeebii icaco icano Moocaaniti, bu Mohaivojiiibo Jesucristoti icano.

Pablo Idaasuno Iicano.

³ Masii Moocaani, Mohaivojiiibo Jesucristo Caanico mihimequi. Miiro diibo Moocaani miihaico iidaasugoobo, bu jaabo diibo Dios miihaico fahiijivaro ajacususuhicaabo. ⁴ Miiro Moocaani miinoco jacusufihi paryi fanoovari idaasuno mihicamoco. Jaabadiro bu miihai idaasuno iicamoco majacusuqui, oono miihaico Moocaani ajacusubadiro. ⁵ Miiro miihai Cristo idaasufañodi mihicamaño, bu diibo Cristofañodiro ajashutino majacusucafetehi. ⁶ Jaamo miihai amiihaico taajasujiiibogoco mijiiibogonoti idaasuno mihicahi. Jaanoti amiihai majacusucafetequi, mataajaqui icano. Jaabadiro bu miihaico Moocaani ajacusuneri amiihai bu majacusucafetequi. Jaamo bu tolliro amiihai siicujeebiiri majaabicihii jino miihai idaasuno mihicanehejeque majaabicihicabadi. ⁷ Jaamaño amiihaico miihai imino mehesicinihi. Oono miihai idaasuno mihicanofañodi tolliro amiihai mihicamaño, bu tolliro Moocaani ajacusunofañodi mihicajinoco icano.

⁸ Monahabomi, mihimeguehi amiihai magaaanoco sihidiro imitineri Asia jiinjijevi miihai mihicahicahininoco, sihidi jeevano idaasuno mihicahicunoco. Jaaneri mosefama machahacuuihi majaabicicujitihii: Fine aivo muchuumucuuji, munuurahi. ⁹ Iguijenicuujiimo iicanicibadi mihicahicauhi. Jaaruno fine jilli mofiiviro esicinitimo Moocaani uchuumucuumoco ubuheetesufibocoro mehesiciniqui iicauno. ¹⁰ Jaabo Moocaani miihaico toonoti taajasuuihi, bu jisu miihaico taajasuuboro icahi, toono sihidi ejeevano miihaico iguijenijirunoti. Diiboviro miihai mehesicinicoo mificuuihi miihaico taajasuuboro iicajinoco. ¹¹ Amiihai miihaico mahamusu, mohallivi Moocaanima mihiiamaa. Jaaneguiiha ajashutimo mohallivi Moocaanima ihiimaahachiiji, diibo miihaico imino mooniji. Jaanoco aatyimemere ajashutimo Moocaanico imeji, miihaico Moocaani imino omooninohallivi.

Jilliti Pablo Corintovi Fuutihi.

¹² Miiro icano sano miihaico imo imo omoonino; jiijehallivi miihai miyanotiro Moocaani imogobadi imino mihicanoco magaaaneri

imo imo mihicahi. Jaamo aivo amihaifeenevi imino mihicahicahi. Moocaani mihaico iimihuseri amuhicahi tolli imino miicaqui. Jaaruno mihai gaajairo tolli mihicano icatino. ¹³ Miuro amihaidi paryi aameneque macaatinihaameneña meneehicahi amihai memee cimoro magaajajidinoco. Jaanoco imeguehi imino magaajanoco. ¹⁴ Oono samañosacoro magaajacuubadi, jaamo ufucu, Mohavojiibo Jesucristo asaajifucu, mihaiti imo imo mihicahi, bu mihai amihaiti mihicajibadi icano. ¹⁵ Jino miyaanoco eesiciniiboro iticoni esamaahinirahi amihai mifooi abaahinijinoco, amihai imo imo mooniqui. ¹⁶ Uujoho esamaahinirahi Macedonijaago ofoobo amihai abaahinijinoco, bu siino tahigoti uhuumiibo amihai abaahinijinoco icano. Jaamo amihai uco mahamusuhi imino Judeavi feequi. ¹⁷ Jilli nooboro uujoho esamaahirunoco, ¿fine uco bañibobadi mehesicinihi? ¿Nacu fine uco amihai mehesicinihi oono imiyaavogotimo saatohoco: Jihi, onomoro, bu saatohoco: Chahano, onoonimobadi? ¹⁸ Miuro Moocaani gaajahi mihai amihai: Jihi, monomoro, bu siino: Chahano, monootatinoco. ¹⁹ Miuro mihai Silvano, Timoteo, uujoho, icamo Cristo Jesu Moocaani Achi jibogoco mijibeguehicaabo: Jihi, onoboro, bu siino: Chahano, neejibuutih. Miuro Cristofañodi paryiicino miyaano mihaifooobaco bañitaiibo. ²⁰ Miuro diibovi paryi miyaavono Moocaani unuuno. Jaamaño Moocaanico mihiimusumi: Aivo Miyaabo idiicaabo, monoonicichi Cristo Jesuco magaajacuunofeenedi. ²¹ Jaabo diibo Moocaani mihaico, bu amihai icano Cristofañ quehecuno ificuuboro itaati miicaqui ijeevadi ficuui. ²² Jaaboro mihaico igajataco ificuuboro Igajaco mojeebinofaño ficuubo, toonoti magaajiqui ufucu niquejefañ magaayicijinoco.

²³ Jaanoti esamaahinibadi Corintovihiica footihi amihai agajimaño. Jaano miyaano iicanoco Moocaani gaajahi. Jaanoti miyaano iicatihachijiji imijiruno uudi uco Moocaani agaicaano, uujoho iguijevane icano.

²⁴ Jaarumo mihai mihimogotih amihai: Jilli mimiyaavogo, noomoro amihai matajibanoco. Miuro amihairyo, miyaavogofañ quehecuno mihicacuui. Ivi jilliro mihimeguehi amihai janaanici imo imo momoonisunoco.

2 Jilliti imeguhinitih amihai siino abaatonoco siino idasuno amihai omoonijiruneguiiha. ² Jaabo uujoho amihai idasuno mooniruva, ¿mijoho bu uco imo imo moonijirahi? Amihai bu uujoho idasuno omooninobuuna. ³ Jilliti amihaidi jino uujoho aameque jilli caatiniuhi amihaijaago ofooboco, uco amihai imo imo momoonijirumo, jilliro idasuno momoonijirunoco iimogotimaño. Jaamaño amihai imitico mejeevesuhachijiji uujoho imo imo icaji. Jaaneri tolliro amihai imo imo mihicaji. ⁴ Miuro toohaameque amihaidi acaatiniusumi idasuno iicaneri tafi uco niji niji iicahicauneri taahicauhi. Jaarumbo toohaameque caatiniutih amihai idasuvusuqui icatino, jilli amihai gaajasuqui sihidi amihai agajinoco.

Imitino Omooniboco Imibachuno.

⁵ Jaanoti oono saafi idasuno omooniboco saafiicoro uco idasuno mooniutih. Tolliro bu paryi amihai mooniboco. Jilliro miiviro neehi. Imogotih janaanici sefano ihibanoco. ⁶ Miuro amihai Moocaanico mihiimusumi diiboco amihafañoti mihiinusucuui. Jaanoti eesafotooboro gaajacuubo. ⁷ Jaaneguiiha jilliro ivi jisumi

diiboma mihimibachumoro diiboco majacusucu, sihidi idaasuno iicaneri janaaniciviro imitino icaadiibo. ⁸ Jaaneguiiha amiihaico neehi: Sino diiboco magaaasu diiboco magaijinoco. ⁹ Miiro iticonio aamefañodi toonoti amiihaico nooboro caatiniuhi, amiihaico gaajasuqui ¿naa uujoho onoobadi moonijimo? onoomaño. ¹⁰ Jaanegui jisumi amiihai oono iimiutiiboco mihimibachucuhachijji, bu uujoho tolliro diiboco imibachucuui. Miiro uujoho iimibachuuboco imibachuhi Cristo imefeenevi amiihaico agaijiiiboro. ¹¹ Toonoti mihaico Satanas quehevediino iguiononiboro, miiro diibo omoonigonoco mihai imino magaajahi.

Troa Cuumivi Pablo Jeebii Niji Niji Icauhi.

¹² Jaanoti Troa micuvi Cristo jii bogoco jii beguequi ufuubo iifutusumi, aivo uudi imiuno Aivojiiibo dudicamaajeque toonovi eetavuujiino.

¹³ Jaarunofaño tajeebii uco sajeebii icautihi, monahabo Titoco toonovi aatyimeutimaño. Jaaneguiiha diitoco ifitacuuboro toonoti fuuhi Macedonia jii ni jejaago.

¹⁴ Jaanegui uujoho Moocaanico imehi, diibo mihaico Cristo Jesuta ijimitaco iguiononimoro miyaminaa mitya mitya agaimuaivomofaño mihaico asatyefinohallivi. Bu jaaboro mihaifeenedi ijiibogoco jii bugusuhicaabo. Oono facici uusuno fahigovadi ofoonicibadi icauhi.

¹⁵ Miiro mihai oono aimoguiijico, Cristo Moocaanico ejeevoobo, ijigasuno uusu fahigovadi atajajimofañodi, bu atajajitimofañodi icano ofoonicibadi mihai paryi miyaminaa iicadimoco mijii beguehicahi.

¹⁶ Jaano atajajitimededi namita uusunicibadi jeevahi. Jaanoti atajajimededi facicino uusuno, fiivoco aacino uusubadi jeevahi. ¿Jaanoco mijoho fine iinoro eetavejirahi? ¹⁷ Miiro mihai nihibamiguiharo Moocaani ijico mijii bogotihii, saato ho iicabadi simañe hejedi ro iinoro ubuunanimoro ijiibeguehicabadi. Miyanotiro naha mihai mijii beguehicahi Moocaani imefeenevi, diibo Moocaani mihaico agalluumo mihicamaño, bu Cristo jeevivominaa mihicamaño icano.

Bohono Iiji Jii bogo.

3 ¿Nacu mihai jilli munuusumi fine amiihaidi, mihai mofitiro imino mihiimaamo meneehicahi? Cha, ¿collihii jaamo mihimeguehi mihaiditi sita aameri: Diito aivo iimihuseme, onoonoco? Amiihairyo imino mihaico magaajacuui. Jaabadiro mihai magaajagotihii sita aameri amiihaiditi jii bogonoco. Jaamaño uujoho ¿collihii caamema icajirahi uuditi sita: Imiibo, noomoro acaatinihaamema? ² Miiro uujoho amiihaico ijiibogusumi, amiihai jeebiifaño mimiyaavuguumoro imino miminifutucuumoco aatyimemere tadyudicamaaje imino iicanoti gaajajirumo. ³ Miiro amiihai toohaamebadi mihicahi, Cristo acaatiniuhaamebadi mihicacuui. Miiro mihai mijii bogomo amiihai jeebiifaño macaatinicuunobadi mificuhicacuui. Jaanoti caatiniiri macaatinicinitihii. Jilli Moocaani iicaabo Gajararo macaatinicinihi. Guisibabujehallivi Moise tajiibano acaatinicinobadi icatino. Jilli miyaminaa jeebiifaño acaatinicinicuuno.

⁴ Jaano mihaidi toono miyaano iicanoco mihai magaajahi Moocaanifañodi, bu Cristofañodi icano. ⁵ Jaamaño mihai momityariro siinoco momoonino icatino. Paryicino fanoovaaco momoonino Moocaaniti

saahi. ⁶ Miïro diïbo miïhaico mityaco aacineri bohono iiji onoobadi diibedi mududicamaahi. Jaano toono bohono iiji oono eedeetajiïbano acaatinicinino iicabadi icatïhi. Jilli Moocaani Gajjati magayicinotionoro iicamaño. Miïro oono acaatinicinino tajiïba Moise tajiïba, guijevefaño satyefihi. Jaanoti naha Moocaani Gaija miïnoco fiivoco acihi.

⁷ Jaano toono Moise tajiïba guisibabujehallivi acaatinicinino aricuno saauhi. Jaamaño israelmi Moise imeque meecihicautïhi ihime sihidi aricuno iifuvusuhicaumaño. Jaaruno toono iharicu jaabavonoro fuuhi jaano totajiïba guijevefaño asatyefiruno sihidi iimima sauhi. ⁸ Jaanegui fine, aivo sihimi icano oono Moocaani Gaija ijiïbogoco mojaago isivano. ⁹ Buhicagaha oono miïnoco guijevefaño asatyefiruno tajiïba iimima icauhi. Jaanegui fine aivo sihimi icano, oono Moocaani jiïbogo miïhaico: Amiihai imitima machahacuuhi, onoobogo. ¹⁰ Miïro totajiïba iticoni iimima icaruno jisumi miyaadi jeevacuutihi, jino sihidi iimima iicanoguinodi. ¹¹ Jaano toono guenene icaujïtiruno iimima icauhi. Jaano janaanici aivo imijino ufucuro ifinjitino iimima icahi.

¹² Jaamaño miïhai toonoco imino magaajamaño, nucufeguetimo mijïibeguehicahi. ¹³ Jaamo miïhai Moise omoonïubadi momoonitïhi diïbo naha ihimeque gaachehubaryuri fabaacuuhi israelmi toono guenene iicajitino aricu ajaabavonoco atyimetimo iicaqui. ¹⁴ Jaarunoco diito gaajatïhi. Jaabadiro bu jisumi toono eedeetajiïbaco emeecisumi tobaryuro diito esamaajeque afabaacucinino iicabadi jeevamo gaajatimo. Miïro tobaryuro diitoti gañïicafototïhiica idiïboro naha Cristofañodi tobaryuro gañïicafetjïrahi. ¹⁵ Miïro jisumihachuta Moise tajiïba aameneque emeecisumi tobaryubadi diitoco ihesamaajeque fabaacuhicahi gaajatimo iicaqui. ¹⁶ Jaano naha jari gañïicafetefïhi Aivojïiïbojaagovi iminifutusumi. ¹⁷ Jaabo Moocaani Gaija iicano, bu Moocaani iicaabo. Jaaneguiiha diïbo Moocaani Gaija iicahigo sajeebïi icahicahi. ¹⁸ Jaamaño paryi miïhai tobaryuri mohimeque mafabaacucinicutimo. Mofiivi Mohaivojïiïbo imi iifuvusuhi, oono meecimefaño mofi iifuvusunicibadi. Jaamaño miïhai janaanïciviro diïbobadi minifotomoro mefehei fahijïivaro janaanïciviro diïbo imibadi minifotomoro mofoomaño. Jaano toono Aivojïiïbo Gaija iicaabo eheetavono.

4 Jaanegui masïi suufenitimo momooniqui, Moocaani miïhaico iidaasugooboro idudicamaajeque atajiïbaunoco. ² Miïro miïhai toovono omoonifinehejeque, bu unucufesunehejeque icano mihimugucuutihi. Bu tolliro sitaaco bañimoro mofootïhi, bu Moocaani iijico simañehjediro buunanïmoro mofootïhi icano. Jilli miyaanocoro meneehicahi. Jaamaño jilliti Moocaani imefeenevi saatohoco magaajasuhi, miïhai Moocaani imefeenevi imino mihicanoco. ³ Jaanoti jino Moocaani taajasujiïbogoco mijïibogono toovono iicahachiïji, oono cijïigaifaño ufuucujïmediro toovono. ⁴ Miïro diito imiyaavogotimo, jïije caani iji ijeebïinoco mitasucuuhi. Jaaneri gaajacuuimo Cristo jiïbogo imico. Jaabo bu Cristo Moocaani iicaabo. ⁵ Jaamo miïhai Moocaani jiïbogoco mijïibugusumi, mofiïditiro mijïibeguehicatïhi, idiïboro Jesucristo amiihai Aivojïiïbo iicaabediti mijïibeguehicahi. Jaanoti naha miïhai jilli amiihai jeeçivominaa mihicamo Cristoco magajïimaño. ⁶ Miïro diïboro Moocaani: Içivuuneguiiha daachicisu, nuubo. Jaaboro jisumi bu diïboro mojeebïinofaño achicisuhi. Tooneri Moocaani imico magaajaqui Jesucristo imefañoti iifuvusunoco.

Miyaavogofeenedi Mihicano.

(1Co 2.1-5)

⁷Jaano toono Moocaani Gaija mofifaño icahi, oono aivo iiminoco nifaqui eetavotahillu guirihillufaña mificujirubadi jeevano. Toonoti igaajaqui toono sihidi ejeevano mitya mihaiti saatinoro Moocaaniti asaanoco.

⁸Jaamaño fanoovari imitino mihicarumo, toonoti mataajanicihi, bu fanoovari gaihuibaro mihicarumo, aivo tooneri idaasuno mihicatatihi, ⁹bu mihaico sihidi ijiiheverumo, Moocaani mihaico jeevesutatihi, bu mihaico iguininorumo, miguijevetatihi icano. ¹⁰Jaamaño fahigovadi mofoomoco gaicaaujirumo Jesuco agaicaaumaño. Jaaneguiiha mofifañodi bohono ifiico Jesu aacinoco mihifusuhicahi. ¹¹Miïro miïhai jino mihicanohachuta fafucuvaaciviro ñihicunofaña mihicahi miïhaico agaicaaujirunofaña Jesuco magaijimaño. Toonofeenedi bohono ifiico Jesu aacino ihifusucafetequi. ¹²Miïro taajasujiibogoco mijiiibeguehicanohalliti miïhaico sita gaicaaujirahi. Jaanofeenedi amiïhai mataajajino ifiico magaajaqui.

¹³Miïro Caatinihaamefaño noono: Miyaaveguehi, jaamaño iimaahi, noonoro. Jaabadiro bu miïhai tomiyaavogofañodiro, mimiyaavogomoro mihiimaahi. ¹⁴Jaamaño miïhai magaajahi Moocaani Mohaivojiiïbo Jesuco ubuheetesuubo, bu miïhaico sano amiïhaima buheetesujiïbo, Jesuma miicaqui. ¹⁵Jaaneguiiha jilli fanoonihicufaña mihicahi amiïhai iiminofaña miicaqui. Jaamo sihidi Moocaani imino omooninoco agaayicimo, toonohallivi ajashutimo Moocaanico sihidi ihiimequi.

¹⁶Jaamaño miïhai suufenitimo momoonihicahi. Jaamo miïhaico mofino niinovatonoro fuurunaaca, mogaija jilliro fafucuvaaciviro buheetenere feehe. ¹⁷Miïro jino jiijehallivi idaasuno mihicaruno goovano fatyonoro feehe. Jaanofañoti magaayiciji ifinijitino imi, aivo aajashutinoco.

¹⁸Jaamo miïhai mahatyimenehejequere mehesamaaitihi. Jilli jisumi mahatyimetinehejequere mehesamaaihi. Miïro mahatyimeneheje guenenene icatatihi. Jaanoti jisumi mahatyimetineheje ufucuro finitino iicajino.

5 Miïro miïhairyo magaajahi oono mofi iija goovano unucufijabadi ejeevanoco. Jaarumo ufucu mihicaji, Moocaani miïhaidi niquejefaño ifinijitino ifiico aacinoma. Toonoco miyaminaati saafiiba acjiritirahi. ²Miïro miyaano jino mofiima mihicanohachuta macanifehicahi, niquejefaño ifinijitino fiivoma mihicacujirunoti. ³Jaanofaña mijicafeteji mofi gaachehufaña iicanicibadi. Jaanegui mojeebii scaimbobadi iicatiqui. ⁴Miïro jino mofifaño mihicanohachuta macanifehicahi, idaasuno mihicaneri. Jaaruno moheedehefiico mujujuuvequi icatino. Jilli bohono ififaño mijicafetejinoco mihimeguehichahi. Jino jijeo ifi echeemefino ifi bohofiti iminifetequi. ⁵Jineguiiha Moocaani miïhaico iimibachuuboro Igaijaco aciuhi ufucu magaayicijino gaajatabadi iicano.

⁶Jaamaño miïhai imino magaajamoro mehesicinihi jino jiijehalliri muhucuma mihicanohachuta toofiiti buhigovi mihicanoco. Aivojiiïboma niquejefaño mihicacinequehiica. ⁷Jaamaño miyaavogofañodiro mihicahi. Jijeonoco mahatyimenejaagodi mihicatithi. ⁸Jaamaño miïhai mesefaquifotomoro mihimeguehi jijeo ififaño mihicanoco mejeevesumoro Aivojiiïboma mihicatonoco. ⁹Tooneguiiha mihimeguehi fahiijivaro Mohaivojiiïboco imo imo momooninoco, jifiima mihicanohachuta,

bu bohono ifiima mihicacuudi icano. ¹⁰ Miiro paryi famooro Cristo aivoji icaga imegavi mihigaiveji paryiicino moticovoocivi momoonihicano jaadaco magaaayiciqui, jiijehalliri mihicausumi imino momooniuno jaadaco, bu imitino momooniuno jaadaco icano.

Sajeebiico Aacino Jiibogo.

¹¹ Jaamaño miihai Aivojiibo ñihicuno omoonijnoco magaajamaño paryiicino miyaminaaco mimiyaavugusuqui momoonihicahi. Miiro Moocaani miihaico gaajacuui. Jaabadiro bu mihimeguehi amiihai miihaico magaajanoco. ¹² Jilli monoomo, miihaiditiro siino imino mihiimaano icatino. Jilli amiihaico meneehi. Jaamo miihai imino momooninoco amiihai magaajamoro quehe quehe miicaqui. Jaamo saatohe ijeebiifañoonoco esicinitimo ificoro: Aivo miihai sihidi mejeevahi, onoomoco mejenaaujirahi miihaihalliti. ¹³ Jaamo miihai mejeegavomo mihicahachiiji, jaafa Moocaaniguiiharo mejeegavehi. Jaanoti jeegavotimo mihicahachiiji jaafa amiihaidi mihimimo. ¹⁴ Miiro Cristo miihaico agaijnoguiino mihicahi, saafiuro famoohalliviro iguijeveunoco magaajamaño. Jaaneri bu famooro iguijevecuunoco. ¹⁵ Jaabo Cristo famoohalliviro guijeveuhi ubuheeme diito ifiguiiharo icacuutimo iicaqui, diibo uchuumuuboro diitedi siino ubuheeteubeguiiharo iicaqui. ¹⁶ Jaamaño miihai saatohoco jijeo miyaminaa eesicinibadi mehesicicutihi, iticoni naha miihai Cristoco jijeo miyaminaa iicabadi mehesicinihicaui. Jaarumo jisu tolli mehesicinicuutihi. ¹⁷ Miiro Cristoma iicacuubo bomiyaminaafirucu eedeeneheje finicuuhi, jisu paryi bonehejerucu.

¹⁸ Jinehejeque paryi Moocaani eetavehi Cristofañodi miihai diiboma sajeebii miicaqui. Jaaboro miihaico tajiibaubo famoovaaco diiboma sajeebii miminiyuhicaqui. ¹⁹ Oono Moocaani Cristofañodi jiiinjiminaaco ifivi sajeebii iminiyuhicaabo diito imitico jeecevotiibo. Jaabo miihaico tajiibauihi toono sajeebii ica jiibogoco miyaminaaco magaaajasuqui. ²⁰ Jaamaño miihai Cristo galluminaa mihicamo. Jaamo miihaifeenedi Moocaani amiihaico cuuhuvahi. Jaaneguiiha amiihaico miihai meneehi Cristo miihaico atajiibaneguiiha: iMoocaanima sajeebii miminifoto! meneehi. ²¹ Jaabo Cristo imitico ajashuno mooniutihi. Jaaruuboco mohalliti Moocaani iimitiiboco mihicanicibadi mooniuihi, diibojaagovi miihai miminifotomoro iticovono ifiima mihicaqui Moocaani imogobadi.

6 Jaaneguiiha miihai Moocaani dudicamaaje nahaboniminaa mihicamaño amiihaico meneehi: Sicamañovi magañisudino Moocaani imihuseque aacinoco. ² Miiro Caatinihaamefaño jilli Moocaani noobo: Jino iimihusesumi ico guubuhi. Jino taajasufucu iicasumi ico amusuhi, nooboro. Jaaneguiiha miihaidi jisumi jino Moocaani imihusefucu, taajasufucu icano.

³ Jaamaño miico miihai mihijeevesutihi, miihai dudicamaajediti miihaiñooba imitino iimaatimo iicaqui. ⁴ Jilliro ivi fanoovavi Moocaani jeevivominaa mihicanoco mihifusunoco mihimeguehi: fanoovari idasuno mihicanoco, fanooti mucuujivaachunoco, fanoovari iminotino mihicaneri icano, siicuno jeebiiri fanoovaaco majaabicinofenedi. ⁵ Miiro miihaico aamihicamo, miihaico civojaanihicamo, miihaiditi ñaaihicamo, bu sihidi jeevano dudicamaajeneri mihicahicahi, bu cigaraco jaabicimoro mihicahicahi, bu sihidi ajebaco jaabicimoro mihicahicahi icano. ⁶ Jaanoco miihai mihifusuhicahi mohimi icafañodi, miyaanoco magaajanofañodi, bu

mosiicujeebiiri majaanibicahicahi, mohimihusefañodi, bu mofifaño Moocaani Gaija iicanoco mihifusunofañodi, bu miikai miya gajima mihicanofañodi, 7 bu miyaavogoco mijiiibogonofeendi, bu mihaifaño Moocaani mitya iicanofeenedi icano. Jaamo toono iticovono icaco magaayicinihi, mahamocasiqii niisugaco magaayicinicibadi. Jaamoro tooneri mofiico magaihuinimoro mefeehi imitimehejediti, bu mahamocasihi imitinehejema icano. ⁸ Jaamo safo mihaico imino obocigomoco iicanicibadi magaayicinihi. Jaanoti safo mihaico aatajagomoco iicanicibadi magaayicinihi. Safo mihaiti imino iimaamo. Jaanoti safo mihaiditi imitino iimaamo. Safo mihaico abañifimoco iicabadi moonimo. Jaarunofañomi miikai abañifimoco mihicatihini. ⁹ Jaamoco mihaico agaajaratimoco iicabadi moonimo. Jaarunofañomi miikai imino agaajacumo mihicahini. Safo iguijevecuumoco iicanicibadi mihaico moonirumo. Jaarumo ¿milli mihicatihini? Safo mihaico aamimo. Jaarumo miguijenicafototihini. ¹⁰ Idaasumo mihicarahi. Jaarumo fahijivaro Cristofañodi imo imo mihicahicahini. Siinoti mucujivaachurumo, ajashutimoco mubusumijenihi niqeejeo busumijeri. Jinehejebama machaharumo, fanoova iminonoma mihicahini icano.

¹¹ Monahabomi, corintominaa, aivo amihaico imino miyaanoco meneehi, paryi mojeebiifaño iicanoco. ¹² Chahacuuno mojeebiifaño amihaico meneejiruno. Jaanoti naha amiikai jeebiifaño icano mihaico amiikai meneejiruno. ¹³ Jaaneguiiha amihaico neehi. Oono caani iseemeque paryi miyaanoco onoonicibadi, paryi amiikai jeebiifaño iicanoco uco monoo, oono amihaico uujoho iicabadi.

Miikai Moocaani Iijati Mihicahini Mojeebiifaño Diibo Iicamaño.

¹⁴ Amihaico neehi: Imiyaavogotimehejema magataavocasidino. Tolli mihicaruva sabadiro mihicajitirahi. ¿Milli bu iimino iimitinoma gataavejirahi? Jaabadiro bu, ¿milli cuuje fucuma gataavejirahi?

¹⁵ Jaabadiro bu ¿milli Cristo ijima gataavejirahi? Jaamaño ¿milli imiyaavogoobo imiyaavogotiiboma gataavejirahi? ¹⁶ Miiro Moocaani jeecivo iijafaño ijinitama sano diibo jeecivotatimo. Miiro miikai Moocaani iicaabo iija mihicamoco, diiboro jilli unuubadi:

Diitofañomi iicaaboro diitoma igueji. Ujejeji diito Caani, bu diiteji taacuumiminaa icano, nooboro.

¹⁷ Jaadi bu jilli noobo Aivojiibo:

iDiito iimitimofeeneti mihiinomoro sihigovi mudugaavo! iJaamoro iidicunoco mududiiicicuudino! Jaachijii amihaico gaayiciji.

¹⁸ Jaaboro amiikai caaniti icaji. Jaanoti amiikai taseemeti mihicajini, noobo Aivojiibo sihidi ejeevaabo.

7 Jaaneguiiha agajimo tañahabomi, jilli Moocaani nuuhi. Jaaneguiiha mihaico mofiico, mojeebiico icano imihininijirunoco moonitimo miicaqui, bu Moocaanico mihiguimoro diibeguiiharo ijeevadi mofiico mificuquui icano.

Corintio Cuumiminaa Iimitono.

² Jaaneguii mihaima imino mihica. Miiro miikaiñoobaco miikai imitino momoonitihini, bu miikaiñoobaco imitino mejeevamaaisutihini, bu miikaiñoobaco mabañihicatihini icano. ³ Jaaruubo jilli onooobi amiikai imitico onoono icatino. Miiro iticoni amihaico unuucubadi: Amihaico uujoho sihidi gajihini. Taciiditi muduujecinihi sano mihicamoro, bu

sano mecheemequi. ⁴Amiihaico imino eesiciniiboro aivo amiihairi imo imo icahi. Jaamaño jino sihidi idaasuno mihicarunofaño aivo imo imo iicaaboro, quehecuno icahi.

⁵Jino Macedonia jiniijevi magasehininotiro aivo mojaguisibama machahahi. Jilli fahigovavi mofoohigo idaasuno mihicahicahi, saatoho miihaico aamineri, bu mojeebiifañoti mihiguinehejeri icano. ⁶Jaarunaaca Moocaani iniinovañimoco equehecutusufiibo, miihaico imo imo miniiyui Tito agaseneri. ⁷Jilli agaseneriro icatino, bu diibo Tito amiihaiti imo imo iicaneri icano. Jaabo miihaico jiiibeguehi amiihai miihaico mahatyimegueneque sihidi mihimogonoco, bu tolliro jiiibogoobo idaasuno mihicanoti, bu tahalliti mihicagonoti icano. Jaaneri sihidi janaanici aivo imo imo icahi.

⁸Amiihaijaago agalluhinihaame amiihaico idaasuvusuhinirunaaca jaaruneri uujoho idaasuvotihii. Iticoni naha idaasuvehinirahi amiihaico toohaame idaasuno omoonihinineri. Jaaruno jilli jihachutarehini.

⁹Jaamaño jisumi imo imo icahi. Jaaruno oono amiihai idaasuno mihicaneri imo imo icatihii, jilli toono idaasuno mihicahinineri amiihai imitico mejeevesumaño. Jaanoco amiihai majaabiciuhi Moocaani iimogonicibadi. Jaamaño miihai amiihaico imitino momoonino icatino.

¹⁰Miiro oono miino imitico mehesafotomoro mihidaasuvonoco Moocaani imeguehi. Jaaneri miino imitico mejeevesuhi. Jaano jino taajasuco miticonino. Jaaneri mihidaasuvotatihii. Jaanoti naha idaasuvurumo Moocaanico agaayicitimo ifinijitino guijevafaño feeji. ¹¹Miiro amiihai imitico mehesafotomoro mihidaasuvehiniihi Moocaani iimogonicibadi. Jaamaño amiihai miyaanocoro mehesamaaiuhi. Jaamaño magaaajuuhi iimitiiboco. Bu amiihai jaabojaago misifiiratucuui. Bu jaamoro amiihai mihigutuui. Jaamaño uco mahatyimeneque mihimeguehi. Bu jaamoro tohimitico omooniiiboco toonohalliti mihiibaumoro Moocaani iijati magañiiuhi. Jaamaño miihai magaaucuui amiihai diibo omoonihinibadi momoonihinitinoco. ¹²Miiro uujoho toohaameque acaatinihinisumi toono imitico eheetavuuboti eesamaaiumaño icatino, bu saafico imitino omooniiiboco eesamaaiumaño icatino. Jilli miihaico sihidi aivo amiihai magaijinoco, Moocaani imefeenevi magaaajuui. ¹³Jaanoco miihai muguubumoro imo imo miminifetehi.

Jaano bu iicanaaca aivo janaanici imo imo mihicahi Tito aivo imo imo iicanoco mahatyimeneri. Miiro amiihai diiboco mahamusuhinihi sajeebii iicaui. ¹⁴Jaamaño amiihaiti uujoho: Imihuseme, diiboco unuunoti nucufevetihii. Miiro paryi amiihaico meneehicano miyaano. Jaabadiro bu amiihaiti Titoco: Imimo, munuuno miyaanoti icahi. ¹⁵Jaamaño amiihaico sihidi gaijiibo, paryi amiihaico ononoco meheetavehicaunoco eesafotooboro, bu diiboco mobocigumoro imihusene magayiciumaño icano. ¹⁶Jaamaño amiihaico imino imiyaavogooboro aivo imo imo icahi.

Miyaavogominaa Gaijitimo AACINO.

8 Tañahabomi, mihimeguehi amiihaico miihiibogonoco Macedonia jiniijeri iicajaji Moocaani iijaminaavi Moocaani imihuse iifusucafotonoco. ²Miiro idaasuno iicaneri nisucafuturumo aivo imo imo icauhi, bu aivo idaasufiirumo gaijitimo aciui sihidi iniihibamima iicamobadi. ³Jaanoco uujoho imino gaajahi aivo gaijitimo iicadinoco aaciunoco. Jaarunofaño bu aivo janaanicivi aciumo. ⁴Jaamoro bu

imogomoro dilluumo monahabomi Cristofenedi Judeari iicamojaa uujoho nihibamico asaasyonoco inahaboniqui. ⁵ Jaamo aivo miikai imino mehesiciniuno janaanicivi mooniumo. Miuro iinoro MohaivojiiBojaagovi minifutuumo. Jaadi mojaagovi minifutuumo, Moocaani imuguubadi.

⁶ Jaaneguiiha Titoco sihidi munuui toono amiihai mihimihusemaño mahacinoco igaayiciqui, bu toono nihibamico ticonihinicuubo iicinoco tahimega ificuuqi. ⁷ Miuro amiihai sihidi janaanici fanoovama mihicahi; sihidi miyaavogoma mihicahi, bu mijiiBogonoco imino magaajahi, bu sihidi gaajama mihicahi, bu sihidi imogoma mihicahi, bu miikaico magaijinoma mihicahi icano. Jaabadiro bu toono sitaaco magaijimoro mahamusunovi janaanicivi mihica.

⁸ Jilli uujoho onoobo toonohallivi amiihaico atajiiBano icatino. Jilli imeguehi amiihai imino momooninoco, toonoti amiihai miyaano sitaaco magaijino igaajacafetequi. ⁹ Miuro amiihairyo magaajacuui MohaivojiiBo Jesucristo imihuseeque. Miuro diibo sihidi busumijeevauruubo amiihaico agaijimaño iidasuuboti minifutuhi. Jaamo amiihai diibo idasufañodi sihidi mubusumijeevahi.

¹⁰ Jaaneguiiha amiihaidi iimiqui toonoti jino eesicininoco neehi: Miuro amiihairyo juufajjio ficabatiro miticovaumo imino momoonihicahi. Jaaruno ticovono momoonihicautihi. Jilli mihimogomoro momoonihicauhi.

¹¹ Jaaneguiiha jisumi tolli momooninoco mihimivusu, oono iticoni mihimugumoro momooniubadiro, amiihaima iicadinoti acimoro. ¹² Miuro saafi sitaaco imogooboro diiboma iicadinoco aacino Moocanidi aivo imino. Jaaruubo Moocaani miinoma achahano janaanicivi miinoco dillutatiibo.

¹³ Jaamaño uujoho nootihi: Saatohoco mahacimoro amiihai idasuno miicaqui. ¹⁴ Jilli sabadiro miicaqui neehi. Jisumi amiihaima sihidi icano. Jaaneguiiha diitoma achahanoco mahaci. Jaabadiro bu safo amiihai mucuujiVaachusumi diito amiihaico aciji. Jilliti jaamo sabadiro mihicahi. ¹⁵ Oono Caatinihaame onoobadi iicaqui: Sihidi iiciubedi atyuuvuutino. Jaabadiro bu miidino iiciuruubedi, cuujiVaachutino, onoobadi.

Tito Inahaboniminaa Iicano.

¹⁶ Aivo uujoho Moocanico imehi, diibo Tito jeebiiFaño amiihaico agaijiBoro amusunoco ificuunohallivi jino uco icabadiro. ¹⁷ Jaabo uujoho diiboco onoonoco imino guubuhi, bu diiboro imeguehi amiihaico aamusunoco. Jaabo iinoro imogooboro feejiibo amiihaico emecitoobo.

¹⁸ Jaaboma magalluhi saafi monahaboco. Jaabo diiboti fahigova iicajaaje Moocaani iijaminaa imino ihiimaahicaaboco, taajasujiiBogoti aamusuhicamaño. ¹⁹ Bu tolliro diiboco Moocaani iijaminaa iicimoro galluui miihaima iigooboro miikaico ihamusuhicaqui, jino sitaaco magaijino dudicamaajeque meheetavomoco ihamusuhicaqui. Jaanoco jino meheetavehicahi MohaivojiiBoco mihimequi, bu amiihai mihimogomoro momoonihicanoco magaajasuqui icano. ²⁰ Jilliti miihaiditi miihaiñooba jino nihibamico mahallacarunoti imitino iimaatimo iicaqui. ²¹ Miuro miikai mihimeguehi imino momooninoco MohaivojiiBo imefeeneviro imino momoonino icatino. Tolliro bu paryi miyaminaa imefeenevi imino momoonihicahi.

²² Jaamisima bu tolliro monahabomiti saafiico magalluhi. Jaabo fanoovaaco momooninoco iimogooboro miikaico amusuhicahi. Jaabo

bu jisumi amihaico imino eesinicumaño aivo imeguehi amihaico aamusunoco. ²³ Jaanoti saatohe amihaico Titoditi idilluhachijji diitoco monoo: Pablo gataavominaafirucu diiboma dudidamaaibo amihaico ihamusuqui, noomoro. Jaabadiro bu oono saatohe monahabomisi idilluhachijji monoo: Moocaani iijaminaa agalluumisi, Mohavojiibo Cristoco iimehicamisi, noomoro. ²⁴ Jaaneguiha diitoco magayici amihaic gajjima mihicanoco fahigova Moocaani ijafaño iicadimo igajajiqui, bu amihaicamihaic imo imo mihicahicano miyaano iicaqui.

Moocaani Iijaminaadi Nihibamico Mahallacaruno.

9 Jaanoti miyaavogofeenedi monahabomi Judeari iicamedi nihibamico mahallacarunoti siino amihaicidi caatinicujitihini. ² Miico amihaic imihuseque uujoho imino gaajacuhi. Fahijivaro amihaiciditi imo imo iicaaboro Macedonia jiiijeminaaco neehicahi: Amihaic Acaya jiiijeminaa juufajijoo ficabatiro mehesicinihicauchi monahabomi Judeari iicamoco mahamusuqui. Toonoti saatohe sihidi Macedonia jiiijeminaa agajamoro imeguehi tolliro diitoco aamusunoco. ³ Jaaneguiha jito monahabomico amihaicijaago galluuhi, amihaiciditi toonoti imino enehicano sicamaño iicajiruneguiha. Jaamo onobadi tolli momooniqui mihimibaicinicuuhi. ⁴ Jilli amihaic neehi saatohe Macedonia jiiijeminaa uuma ofoomo amihaic atyimedino mihimibaivotimoco. Jaaneri mihaic munucufvejirahi sihidi amihaiciditi imino mihimaahicarumo. ¿Milli bu amihaic nucufesuco neejirahi? ⁵ Tooneguiha jito monahabomico imegavi galluuhi amihaic ibaatequi. Jaamo amihaic mahallacaruji, munuunoco ihamusuqui. Jilliti amihaic mahallacaruno imitucuuno. Tolliti amihaic imihuse igajacafetequi, mihaic amihaic midilluneguiharo mahacino iicatiqui.

Jaaneguiha amihaic ⁶ olli onoonoco mehesafoto: Miidino abasuubo, bu miidino iciji. Jaanoti bu guiraano abasuubo guiraano iciji. ⁷ Jaaneguiha famooro mahaci amihaic jeebii onoodino, gajjimoro icatino, bu sita idilluneguiharo icatino. Miico Moocaani gajijhi gajijitibo imo imo aacifiiboco. ⁸ Miico Moocaani amihaic fanoovaaco sihidi acijirahi. Jaamo jinehejebati cuujivaachutum mihicahi. Jaamoco bu janaanicivi acijiibo, tooneri iminoono dudidamaaje eheetavomoco mahaciqui. ⁹ Miico Caatinahaame jilli neehi:

Jaabo imihusebe gajijitibo iidaasumoco acifihi. Jaani iimihuse ufucuro finijitihini, noonoro.

¹⁰ Jaabo Moocaani fanoova toogaiñoco mabasuuqui aacifiibo, bu amihaic machutaaco aciji. Jaaboro bu amihaic aciji paryi diibo dudidamaajeque meheetavejinoco. Jaaboro bu toonoco ujisusuuboro guiraatusujiibo ajashutino iiminoono dudidamaajeeneti. ¹¹ Jaamo tolliti amihaic fanoova imima mihicaji. Jaamo gajijitimo mahacihicahi. Jaano toono nihibamico mahallacarunoco mofeenedi magalluunohallivi monahabomi Moocaanico imeji. ¹² Jaano toono nihibamico monahabomico mahacino ucuujivaachuneguiharo mahacino icatino, bu tolliro toonohallivi Moocaanico sihidi iimequi icano. ¹³ Miico diito Moocaanico imeji. Jaamoro toonofeenedi gaajajimo, amihaic Cristo jiiibogo onobadi momoonihicanoco. Jaanohallivi bu Moocaanico bociguejimo amihaic gajijitimo diitedi, fameeguiharo icano mahacinohallivi. ¹⁴ Jaamoro amihaic sihidi agajjimoro amihaicihallivi Moocaanima iimaajimo

amihaifeenedi Moocaani iimihuseque iifusumaño. ¹⁵ Jaaneguiiha Moocaanico mihimo Illi sihidi ejeevaaboco mihaico aacinohallivi.

Pablo Idudicamaajehalliti Iimaahi.

10 Uujoho Pablo amihaico dilluhi Cristo siicujeebiiri, imihuseri icano. Miïro uco neehicamo, amihaima iicasumivaha, uujoho siicuno iimaahicahi. Jaanotivaha sihigo iicasumi mityaabobadi amihaima iimaahicahi icano. ² Jiï, jaaneguiiha amihaico neehi: Uujoho amihaico emeecitodi, uco misifiiratusudino, oono amihaiti saatoho mihaico: Jilli ticovo jiinije miyaminaa iicahicabadiro moonihicamo, eneehicamohallivi. Miïro diitoma iibacasijnoco imibaicinicuui. ³ Jiï, miyaanoco, noomo mihai miyaminaa mihicanoco. Jaarumo mihai jilli ticovo jiinijeminaa aamocasinicibadi mahamocasitihî. ⁴ Miïro mihai jiinijeminaa iibacasinineri, abañineri, bu fanoovari omoonicasinicibadi momoonicasitihî. Jilli Moocaani mityariro miyaminaa sefa eesamaaiñehejeque mifinisuhî. ⁵ Jaabadi mifinisuhî mihaiditi iminootino eneehicanehejeque, bu comityanehejehacho icano Moocaanico agaajasujitirunehejeque icano. Jaamoro paryi miyaminaa esamaajeque Cristoguiinovi mificuuhî, diiboco imityaguequi. ⁶ Jaamo amihaî imino muguubucuudî, saatoho uguubutinehejeque mihaî mahaamiji.

⁷ Miïro amihaî allionocoro magaaahî. Jaanoti saatoho Cristotahe icanoco imino agaaajamo, bu igaaajahi tobadiro mihaî Cristota mihicanoco. ⁸ Jaabo uujoho Cristo mihaico aacino mityama mihicanoti sihidi ihiimaaruubo, uujoho toonoti nucufevetihî. Miïro Mohaivojiibo mihaico jino mityaco aciuhî amihaî miyaavogoco mujusisuqui, jilli mifinisiqui icatino. ⁹ Jaanegui uujoho amihaico aamenefañodi jilli iigutusuuno, noomoro saatoho eesamaañoco imogotihî. ¹⁰ Miïro neehicamo: Tahaamenefañodivaha sefano, mityano iimaahicahi. Jaanoti amihaïmavaha iicasumi niinovano icahicahi, siicuno iimaahicahi icano, noomoro. ¹¹ Jaamo tolli meneehicamo magaaaja, mihaî sihigoti aameneque magalluhaamejefañõ mihimaahicabadiro, bu amihaifeenevi mihicadi momoonijinoco.

¹² Miïro mihaî mofiico momoonitihî, oono saatoho ifiditiro imino ihiimaahicamo ticovovi mihifetequi icatino, bu diitobadi mejeevaqui icatino icano. Diito jilli mihiifomo icamo, ifiviro ifiico ohoovicimaño, bu saminaaro fahigova ohoovicicasimaño icano. ¹³ Jaanoti naha mihaî mofiico mitya mitya momoonitihî mihaïño iicatineri. Jaanoti naha idiïboro Moocaani mihaico onoodinoro meheetavehi. Jaabo bu onobadi amihaïjaago mihifetehi Corintovi. ¹⁴ Jaamaño mihaico Moocaani atajiïbano janaanicivi mafatyotihî. Jaanoti naha amihaïvi mihifututuruva naha, Moocaani unuuno janaanicivi mafatejirahi miïro mihaî iticoni amihaïjaago Cristo jiïbogoco masatyuuhî. ¹⁵ Jaamaño mihaî sita dudicamaajeriro quehe quehe mihicatihî. Ivi jilliro mihimeguehi amihaî miyaavogo iguiratonoco. Bu tolliro mihimeguehi amihaifeenevi janaanicî mududicamaañoco. Jaarumo Moocaani mihaico uhuuvuunoco mafateyjitihî. ¹⁶ Jaadi bu janaanicivi mafateyji amihaî janaanicî iicamojaago, diitoco taajasujiïbogoco mijiïbeguequi icano. Jaamaño uujoho sita dudicamaajeriro quehe quehe icatihî.

¹⁷ Jaanoti cajaanoyhacho ifiico quehe quehe omoonihachiiji, Aivojiïboditiro quehe quehe iicaqui. ¹⁸ Miïro ificoro: Uujoho aivo imino

amiihai imino muguubunicifihi, oono: Miihaico mejeecivo, noomoro amihaico atajibahicamoco, bu amihaico ananihicamoco, bu amihaico iguionihicamoco, bu amihaico jhovotobadi omoonihicamoco, oono bu amiihai imefaño amihaico agabacuhicamoco icano. ²¹ Jaanoti naha miihai tolli momooniutihi mesefautimaño. Jaano nucufesurunoco jino neehi.

Jaanoti saatoho nucufeguetimo ihiimaabadiro bu uujoho iimaahi; jino jilli ejeegavoobo iicanicibadi. ²² ¿Nacu jaamo hebreomi diito? Jaabadiro bu uujoho hebreomioobo. ¿Nacu Israel jiinijeoto diito? Jaabadiro bu uujoho? ¿Nacu bu Abraham iyaachimihai diito? Jaabadiro bu uujoho icahi. ²³ ¿Nacu diito Cristo jeecivominaa? Miiro diito janaanivivi uujoho icahi. Jino ihiimaano ejeegavoobo onoonicibadi neehi. Miiro diito janaanivivi uujoho dudicamaaihi, bu diito janaanivivi uujoho gaicicafetehi, bu diito janaanivivi uujoho civojanicafetehi, bu fiiva foova uujoho gujjevati fatyehicahi, ²⁴ bu sahusefoova uco judiomi aamiuhi treinta y nuevedifoova gaicihicauco. ²⁵ Bu mifoooci, safo icano aamicafutuhi imeiri. Jaanoti safooro uco guisibaneri aamiumo. Bu tolliro mifoooci, safo icano ufuuboma cijijigaimenenene fiimacamaaiuhi. Jaabo safoono imuuaiña icauhi fucu, cuuje icano fatyuuhi nifaihufaña. ²⁶ Bu ajashutino igooboro feehicahi teehino ñihicunofañodi, bu tolliro nanivaminaa ñihicumehejefañodi, bu tolliro taajiinijeminaa, bu siijiinijeminaa icamo ñihicumehejefañodi feehicahi. Bu tolliro cuumino ñihicunehejefañodi feehicahi. Tolliro buhigueje muuaño icano ñihicunehejefañodi feehicahi. Bu tolliro miya gataavominaa iicatimo, ñihicumehejefañodi feehicahi. ²⁷ Tolliro bu sihidi dudicamaaiboro feehicahi, bu fanoova uco iidaasvusunofañodi feehicahi. Fiiva foova cigaraco jaabiciiboro feehicahi. Ajebanoco, adufraco icano jaabiciiboro feehicahi. Guiraafoova machutiibo icauhi. Bu siicuraco jaabicahicauhi, gaachehubama chahahicauhi icano.

²⁸ Jaana janaanivivi bu iicarunehejeque nootih. Miiro fafucuvaacivi paryi Moocaani iijaminaati eesamaañeri tajeebi niiji niiji icahicahi. ²⁹ Miiro saatoho iniinovasumi, uujoho bu niinovano icahicahi. Bu saatohoco sita imitinofaña agañisusumi, uujoho sifiirari idaasuno icahicahi. ³⁰ Jaanocoro toneheje tañiinovaco iifusunocoro uujoho iimaajirahi. ³¹ Miiro Moocaani Mohaivojiibo Jesucristo Caanico fahijjivaro iimono ufucuro finitino icaji. Jaabo gaajahi uujoho jino miyaanoco onoonoco. ³² Miiro Damasca cuumiri iicausumi, tuucuumi aivojiboti, imiya aivojiibo Aretas onoobo ificuubo itoomominaaco tuucuumi guhuganovi ficuui, uco agaayicimoro civojafaña isatyequi. ³³ Jaarunaaca uco jiibaifaña ijihaacuumoro tuucuumi mecuhallidi jahisivi niitusuumo. Jaamaño jilliti taajauhi diibo useti.

Gaijanoco Pablo Aatyimeuno.

12 Miinoditiro imino mihiimaano jilli mihiifono. Jaarunofaña iimaaji Aivojiibo uco gaijaco iifusuhicanoco, bu agaajasuhicanoco icano. ² Miiro uujoho gaajahi saafico Cristoco imiyaavogooboco. Jaabo satyocafutuui niquejefaña, aivo janaanivi iicajefaña, siicije toonoti fahuseeci siino mificabaci, mificabaci idiino ficabanoco mafatyucuui. Jaanoco gaajatihi fine ifiima baacho fuubo, igajaro baacho fuuhi. Jaanoco iidiiboro Moocaani gaajahi. ³ Jaarunoco uujoho gaajahi diibo ufuunoco; ifiima baacho, igajaro baacho idiiboro Moocaani toonoco gaajahi. ⁴ Miiro Moocaani iicahigo niquejefaña satyocafutuubo. Jahigo guubuubo

agaajaratino iimaaco aivo miihaiñooba ijiiibeguejiturunoco. ⁵ Jaabediti uujoho: Aivo mityaabo, neejirahi. Jaanoti tafiiditiro: Aivo mityahi, nootihi; idiinoro naha tañiinovatí iimaajirahi. ⁶ Jaanoti naha tafiiditiro imino jiiibuguruva, bu sicamaño icajitiruno, miyaanehejequere ijiiibogomaño. Jaaneguiiha tafiiditiro imino jiiibogotíhi, saatoho uuditi janaaníci eesamaajiruneguiiha. Jilli uco aatyimentitiro, bu tahiimaaco uguubunotiro icano igaajaqui.

⁷ Jaano toono Moocaani uco iifusuno, aivo uudi sihidi ejeevauno. Jaaneri uujoho sihidi tafico mitya mitya omoonijiruneguiiha tafifaño aivoco Moocaani ficuuhi. Jaano taahucufaño icahi januuutu macafatyicinibadi. Jaanoco ijiro juvivehi, tooneri uco idaasuno imooniqui. ⁸ Jaano toonohallivi mifooci, safo idiino Aivojiiiboco dillucuurahi toono aivoco uuti ibuusuqui. ⁹ Jaarunofaño Aivojiiibo uco neehi: Ico agaijinofaño fanoovari diica. Miíro ifi iniinovamofañodi tamitya aivo janaaníci ifusucafetehi, nooboro. Jaamaño jino iniinovaneri imo imo icahi tafifeenedi Cristo mitya ihifusucafetehi. ¹⁰ Jaamaño tañiinovaneri imo imo icahi, bu tolliro uco imitino ononehejeri, bu fanoovati ucuujivaachunehejeri, bu uco ijiiheguenehejeri icano. Miíro uujoho niinovaabobadi iicasumi aivo janaaníci Cristo sefama icahi.

Pablo Corintominaaco Agaijiiiboro Esamaahi.

¹¹ Amiihai uuditi imino mihiimaaujirahi. Jaaruno iicanaaca uuro tafiiditiro ihiimaamaño jeegavominaafibadirucu. Miíro uujoho sihidi jeevatiruuubo, oono amiihai: Sihidi ejeevano minisuminaa, noomoro diito dojicuti mefeheicamo guinovi icatíhi. ¹² Miíro oono amiihaifeenevi sihidi fanoovaaco jaabiciiboro ududicamaaihicauno imino gaajacafutuuhi iifusuneri, aatyimeratatinehejeri, ajabafiranehejeri icano. Jaanoti magaajahi uujoho miya minisuminaafi iicanoco. ¹³ Miíro sijahaje Moocaani iijanominaaguinovi amiihaico moonitirahi idiinoro naha tafiiiguiiha nihibamíco amiihaico dilluutíhi. Jaaneri fine amiihaico imitino omooniuonoco mihimibachusiqui sajeebii miicaqui.

¹⁴ Miíro amiihaico mifooci baajecuuhi. Jaabo siino bu amiihaico baatequi imibaivucuuhi. Jaabo amiihaico uujoho jinejebaco dillujitíhi. Miíro amiihai nehejeguiiha feejitíhi, jilli amiihaiguiiharo feeji. Miíro caanimi iseemeguiiha nihibamíco allacarufíhi, iseeme caanimiguiiha allacarutatíhi. ¹⁵ Jaabadi uujoho paryi tañehejeque amiihaihallivi gañiiijirahi imo imo. Jaabadiro bu tafico uujoho finisujirahi amiihai jeebiinohallivi. Miíro uujoho amiihaico sihidi agaijitonaaca, amiihai uco guinoviro miidino magaijíhi.

¹⁶ Miíro amiihaiti saatoho, uujoho amiihaico jinejebaco idilluutinoco, imino gaajarumo neehicahi: Amiihaico abañiuborovaha tacuraihufaño gañiisuuhi, noomoro. ¹⁷ ¿Nacu amiihaico bañiui amiihaijaago oono saatohoco agalluumofeenedi? ¹⁸ Miíro Titoco uujoho tajiibauhi amiihaico ibaatequi. Jaaboma bu saafi monahaboco galluui. ¿Nacu Tito amiihaico bañiui? Miíro misi sabadiro mihicafíhi, bu sagaijafeneediro.

¹⁹ Fine amiihai mehesicinihi; jilli mofeenevi ifiguiiharo icamisi, noomoro. Jaaruno tolli icatino. Miíro misi Cristotaotisi Moocaani imefeenevi mihiimaahi. Jaamo paryi agaijino nahabomi, amiihai miyaavogoco amusuqui. ²⁰ Miíro uujoho ñihicuguehi amiihaico emececitodi, uujoho iimogobadi mihicatimoco aatyimeneque, jaabadiro

bu amiíhai mihimogobadi iicaaboco mahatyimejitinoco icano. Bu tolliro ñihicuguehi amiíhaifeenevi iibacasio iicanoco, bu sitaaco inohallitiro mijiiheveneheje, bu icajiisuhano, bu gajiraneheje, bu sicamaño jiiibogoneheje, bu dejecuneheje, bu mitya mitya icaneheje, bu igavusumi imino momoonitineheje icano iicanoco. ²¹ Bu tolliro ñihicuguehi jino siino amiíhaico abaatoobo, Moocaani amiíhai imitico aatyimeneri unucufeneque. Bu jaabadiro ajashutimo saatoho amiíhaiti siicijetiro imitico omoonihicame; toono iimitico jeevesutimo iicahicamoditi, bu oono ajevanhejeque, bu fanoova iimitino imogonehejeque icano omoonihicamoditi uujoho aivo idaasuveji.

Afagoono, Niino Iimaa Icano.

13 Miíro amiíhaico mifooci baajecuuhi. Jaabo siino bu jino amiíhaico baateji. Jaamo saatoho imitico omoonimohallivi mijiiibogodi miimisiici, saafi idiimo diibohallivi mijiiibogohachiiji miyaavegueji. ² Jaamo siicijetiro imitico omoonihicamoco faguucuuhi siino eeguejeusumi. Bu paryi famoocoro jino siino tehesinoti neehi: Jino siino amiíhaico abaatodi amiíhaico idaasugucujitíhi. ³ Jaadi jari magaajaji, Cristo tafenedi ihiimaanoco, magaajaguehicanoco. Jaabo Cristo amiíhaico omoonidi niinovajitíibo miíro amiíhaifeenevi isefaco gaajasujiibo. ⁴ Miíro miyaano iniinovaaboco iicanicibadi tetecuumo. Jaaruubo oono icahi Moocaani mityari. Jaabadiro bu miíhai diibo niinovajaagodi mihicahi. Jaarumo diibofañodi mihicacumaño Moocaani mityari mihicaji, toonofenedi amiíhaico mahamusuqui.

⁵ Jaaneguiiha amiíhairyo amiíhai ifico magaajaci. ¿Naa imino miyaavogofañ mihicanoco? Amiíhai ifico imino minisu. Miíro amiíhairyo magaajahi Jesucristo amiíhaifaño iicanoco, miya miyaavogominaa mihicahachiiji. ⁶ Jaabadiro bu uujoho imeguehi amiíhai magaajanoco, miíhai miya miyaavogominaa mihicanoco. ⁷ Jaamo miíhai amiíhahallivi Moocaanima mihiihaahicahi, imitico amiíhai moonitimo miicaqui. Jaaruno miíhai imino mihicanoco magaajasuqui icatino, jilli amiíhai iminocoro momooniquiguiiha, jilli miíhaiditi imitino mehesicinirunaaca. ⁸ Miíro miíhai miyaanoditi imitino momoonititíhi, miyajiiibogoguiharo momoonihicahi. ⁹ Jaamaño miíhai niinovano mihicarunaaca amiíhai sefano iicamaño miíhai imo imo mihicahicahi. Jaamo miíhai Moocaanima amiíhahallivi iimaamoro mihicahi, aivo amiíhai imitibama ufucu chahamo miicaqui. ¹⁰ Jaaneguiiha jihaameque amiíhaidi caatiníhi amiíhaico abaatejino imegaviro. Jaabo amiíhaijaago ufuusumi sefano amiíhaico moonitíibo icaqui, jino tamitya Aivojiiibo uco aacininino mityari. Tooneri amiíhaico jususuqui aacininino, jilli amiíhaico finusuqui icatino.

¹¹ Jaaneguiiha tañahabomi, tahigo imino mihica, bu amiíhai jeebiífaño iimitinobama chahamo mihicajinocoro miguiino, bu amiíhaico afajininoco magaayici, bu sabadiro imo imo mihicamoro sajeebii mihica icano. Jaafa Moocaani gajico, sajeebii icaco icano aaciibo amiíhaima icahi. ¹² Fahigovavi midilluucasi ihiibicicasimoro. ¹³ Jimañeri iicamo miyaavogofañodi monahabomi paryi iijico amiíhaijaago galluuhi.

¹⁴ Mohaivojiiibo Jesucristo imino omooninoco magaayici, bu Moocaani gajico, bu Igaíja amiíhaima iicajinoco icano.